

**MINISTARSTVO
OBRAZOVANJA, NAUKE,
KULTURE I SPORTA**

639

Na osnovu Zakona o organizovanju i djelokrugu kantonalnih ministarstava i drugih organa kantonalne uprave Srednjobosanskog kantona („Službene novine Srednjobosanskog kantona“, broj: 15/12, 17/12 – ispravka teksta i 11/19), ministar obrazovanja, nauke, kulture i sporta Srednjobosanskog kantona donosi

**P R A V I L N I K
O IZMJENAMA PRAVILNIKA
O TAKMIČENJU I SMOTRI
UČENIKA OSNOVNIH I SREDNJIH ŠKOLA**

Član 1.

(Termini izrade kantonalnog kalendara takmičenja)

U Pravilniku o takmičenju i smotri učenika osnovnih i srednjih škola („Službene novine Srednjobosanskog kantona“, broj 12/19; u daljnjem tekstu: Pravilnik) stavovi (1), (2) i (3) člana 6 mijenjaju se i glase:

„(1) U skladu s odobrenim nastavnim planovima i programima (NPP-ima), kantonalnim kalendarom školskih takmičenja i smotri učenika, navedene aktivnosti utvrđuju se i planiraju godišnjim planom i programom rada škole (GPR-om) za narednu kalendarsku godinu.

(2) Kalendar kantonalnih takmičenja i smotri učenika (predmeti i takmičarske discipline) utvrđuje Ministarstvo do kraja jula tekuće školske godine za narednu školsku godinu te ga objavljuje na svojoj web stranici.

(3) Kalendar za više nivoa takmičenja i smotri od kantonalnog nivoa utvrđuju organizatori takmičenja (Ministarstvo, strukovno udruženje za određeni predmet, nevladine organizacije, pedagoške institucije i sl.) koje trebaju pravovremeno dostaviti Ministarstvu prijedlog svojih termina takmičenja na uvid, najdalje do 15. jula tekuće školske godine radi planiranja kantonalnih takmičenja i smotri za sljedeću školsku godinu.“

Član 2.

(Termin održavanja takmičenja)

Član 7. Pravilnika mijenja se i glasi:

„(1) Takmičenja i smotre učenika osnovnih i srednjih škola održavat će se prema sljedećem kalendaru:

- a) školsko takmičenje – tokom januara / februara
- b) općinsko / međuopćinsko takmičenje – tokom februara / marta
- c) kantonalno / međukantonalno takmičenje – tokom marta / aprila / maja
- d) federalno takmičenje, u skladu s utvrđenim terminima organizatora
- e) državno takmičenje, u skladu s utvrđenim terminima organizatora

f) međunarodno takmičenje, u skladu s utvrđenim terminima organizatora.

(2) Školska takmičenja učenika, odnosno općinska takmičenja učenika, prema određenom NPP-u, za pojedina područja, održavaju se istog dana u svim općinama s područja Kantona, o čemu će organizator obavijestiti Ministarstvo i škole.“

Član 3.

(Sadržaj kantonalnog kalendara takmičenja i smotri)

Član 8. Pravilnika mijenja se i glasi:

„(1) Kantonalni kalendar takmičenja i smotri učenika sadrži sljedeće podatke:

- a) naziv takmičenja
- b) mjesto i naziv škole / domaćina takmičenja i smotre učenika
- c) datum početka svakog nivoa takmičenja i smotre učenika.

(2) Sve izmjene i dopune kalendara takmičenja i smotri učenika provode se uz prethodnu saglasnost Ministarstva, a na prijedlog aktiva direktora.“

Član 4.

(Domaćin takmičenja i smotri)

Stavovi (1), (3) i (5) člana 9. Pravilnika mijenjaju se i glase:

„(1) Školska takmičenja i smotre učenika organizuju i provode škole i školski stručni aktivni nastavnika pojedinih predmeta, prema kantonalnom kalendaru takmičenja učenika.“

„(3) Kantonalna takmičenja učenika organizuje domaćin na prijedlog aktiva direktora, a koje odobrava Ministarstvo. Domaćin, na prijedlog aktiva direktora, imenuje komisiju za organizovanje i realizaciju takmičenja (za određeni NPP i područje).“

„(5) Pozive i dnevni red uređuju i dostavljaju organizatori (domaćini) takmičenja, a nakon dogovora s Ministarstvom.“

Član 5.

(Prijava za takmičenja i smotre)

Član 10. Pravilnika mijenja se i glasi:

„(1) Učešće učenika i njihovih nastavnika / mentora na određenim nivoima takmičenja i smotri škola prijaviti će domaćinu / organizatoru određenog nivoa takmičenja ili smotre.

(2) Za pravovremenost prijave i tačnost podataka odgovorna je škola, odnosno direktor škole.

(3) Neblagovremene, nepotpune i nečitke prijave organizator neće prihvatiti.“

Član 6.

(Saglasnost Ministarstva za takmičenje i smotru)

Član 12. Pravilnika mijenja se i glasi:

„Učenicima osnovnih i srednjih škola mogu učestvovati na državnom, federalnom i međunarodnom takmičenju i smotri uz prethodnu saglasnost Ministarstva.“

Član 7.

(Donošenje propozicija za takmičenja i smotre)

Član 13. Pravilnika mijenja se i glasi:

„Propozicije takmičenja i smotri učenika donosi organizator

takmičenja i smotre, uz prethodnu saglasnost Ministarstva.“

Član 8.

(Učešće na takmičenjima i smotrama)

Stav 3. člana 14. Pravilnika mijenja se i glasi:

„(3) Ekipni plasman škola dobije se na osnovu zbira svih učesnika jedne škole.“

Član 9.

(Kriteriji za učešće na takmičenjima i smotrama)

Stav (6) člana 15. Pravilnika mijenja se i glasi:

„(6) Bez obzira na postignute rezultate na općinskom nivou, sve škole ostvaruju pravo učešća na kantonalnom nivou takmičenja. Broj učenika takmičara i smotre na kantonalnom nivou, pojedinačno ili ekipno, u skladu je s propozicijama takmičenja.“

Član 10.

(Dostava rezultata s takmičenja i smotri)

Član 16. Pravilnika se briše.

Član 11.

(Dostavljanje dokumentacije s takmičenja i smotri Ministarstvu)

Član 17. Pravilnika mijenja se i glasi:

„Organizatori / domaćini takmičenja i smotre učenika (općinski i kantonalni nivo) obavezni su Ministarstvu, nakon održanog kantonalnog takmičenja i smotre (u roku od 15 dana) dostaviti dokumentaciju (informer / bilten), iz koje se vide rezultati i poredak, imena i prezimena pojedinaca ili nazivi ekipa za viši nivo takmičenja i smotri učenika (federalni, državni ili međunarodni), što se objavljuje na web stranici Ministarstva.“

Član 12.

(Trajanje takmičenja i smotri)

Član 18. Pravilnika mijenja se i glasi:

„(1) Na svim nivoima takmičenja učenici rješavaju testove / zadatke pismeno i / ili usmeno (čiji se odgovori vrednuju bodovima) i / ili izvođenjem eksperimenata i / ili radnih operacija i umjetničkom produkcijom te prezentacijom portofolija i istraživačkih radova, a sve u skladu s posebnim pravilima / propozicijama koje se dostavljaju Ministarstvu na odobrenje, najkasnije 60 dana prije početka svakoga konkretnog takmičenja i smotre.

(2) Vrijeme izrade testa ili zadataka na kantonalnom nivou takmičenja učenika traje do 120 minuta, a na nižim nivoima takmičenja do 90 minuta.

(3) Takmičarske komisije određuju vrijeme, posebno za izvođenje eksperimenata, praktičnih radnih operacija i produkcija te za prezentacije radova.“

Član 13.

(Izrada i bodovanje testova odnosno zadataka)

Stav (2) i stav (4) člana 19. Pravilnika mijenjaju se i glase:

„(2) Testove, odnosno zadatke za općinska takmičenja učenika osigurava komisija, koju imenuje organizator, u skladu s određenim nastavnim planom i programom.“

„(4) Testove, odnosno zadatke za kantonalna takmičenja

učenika osiguravaju komisije koje čine nastavnici (konkretnog predmeta ili područja) imenovani od strane organizatora na prijedlog aktiva direktora, u skladu s određenim nastavnim planom i programom, na osnovu prikupljenih prijedloga koje mogu dostaviti: škole, pojedini nastavnici, pedagoške ustanove, strukovna udruženja, nevladine organizacije i sl., uz poštovanje tajnosti.“

Stav 3. člana 19. Pravilnika briše se, te stavovi (4), (5), (6) i (7) postaju stavovi (3), (4), (5) i (6).

Član 14.

(Tajnost takmičarskih zadataka i čuvanje učeničkih radova)

U članu 20. Pravilnika briše se stav (1).

Član 15.

(Sastav i obaveze kantonalne komisije)

Stav (1) člana 21. Pravilnika mijenja se i glasi:

„(1) Kantonalna komisija za realizaciju kantonalnog takmičenja iz određenog područja (fizike, matematike i sl.) ili kantonalne smotre, imenuje organizator, prema određenom NPP-u i kantonalnom planu takmičenja i smotri za narednu kalendarsku godinu, na osnovu prijedloga koji dostavlja aktiv direktora škola.“

Član 16.

(Poslovi kantonalne komisije)

Tačka c) u članu 22. Pravilnika briše se, te tačke d), e), f), g), h), i), j) i k) postaju tačke c), d), e), f), g), h), i) i j).

Član 17.

(Uloga i obaveze nastavnika / mentora)

Tačka d) u članu 23. Pravilnika briše se.

Član 18.

(Rješavanje žalbi)

Stav (1) člana 25. briše se.

Član 19.

(Pohvale i nagrade za osvojena mjesta)

Član 26. Pravilnika mijenja se i glasi:

„(1) Za osvojeno I, II i III mjesto na školskom i općinskom takmičenju učenika, učenici se nagrađuju diplomom i / ili nekom odgovarajućom prikladnom nagradom, poklonom, a ostali učesnici takmičenja i smotre dobivaju pohvalnice, a domaćin i mentori dobivaju zahvalnice.

(2) Domaćin takmičenja i smotri učenika može nastavnicima / mentorima učenika takmičara i smotri dodijeliti pohvalnice / priznanja za trud na ostvarenju ciljeva i podršku kvaliteta takmičenja i smotri.

(3) Na kantonalnim takmičenjima i smotrama, kojima je organizator Ministarstvo, dodjeljuju se za tri prvoplasirana mjesta novčane naknade ili prikladna nagrada u novčanom iznosu, kako slijedi u tabeli broj 1:

Tabela broj 1

Redni broj	Osvojeno mjesto	Iznos naknade za učenika pojedinačno (u KM)	Iznos naknade za ekipni plasman (u KM)	Iznos naknade za nastavnika/ mentora (u KM)
1.	I mjesto	300,00	300,00	300,00
2.	II mjesto	200,00	200,00	200,00
3.	III mjesto	100,00	100,00	100,00

(4) Svako takmičenje ili smotra, bez obzira na broj učesnika, odnosno da li se radi o učenicima jednog razreda ili dva i više razreda, može imati isključivo samo po jedno prvo, drugo i treće mjesto.

(5) Ministar će odobriti raspodjelu finansijskih sredstava za određeno takmičenje i smotru na osnovu finansijskog plana domaćina, koji je određenu aktivnost evidentirao kroz godišnji plan i program škole i koja je uključena u kantonalni plan i kalendar školskih takmičenja i smotri.“

Član 20.

(Sadržaj diploma / priznanja i potpisivanje)

Tačke c) i d) stava (2) člana 27. Pravilnika mijenjaju se i glase:

„c) za školska i općinska takmičenja izrađuje, s logom Ministarstva, domaćin;

d) za kantonalna takmičenja i smotre izrađuje Ministarstvo.“

Član 21.

(Evaluacija takmičenja i smotri)

Stav (1) člana 36. Pravilnika mijenja se i glasi:

„(1) Radi praćenja kvaliteta takmičenja i smotri te podizanja njihovog budućeg kvaliteta, organizator takmičenja ili smotre obavezno će, preko evaluacijskih listova, provjeriti stavove, razmišljanja i ocjenu učesnika takmičenja i smotri (učenika, nastavnika/mentora), te izraditi analizu i prijedlog Ministarstvu za poboljšanje kvaliteta i organizacije takmičenja i smotri ubuduće.“

Član 22.

(Stupanje na snagu)

Ovaj Pravilnik stupa na snagu danom donošenja i bit će objavljen u „Službenim novinama Srednjobosanskog kantona“ i na web stranici Ministarstva.

Broj: 03-34-37/24
27. februara 2024.

Travnik

MINISTAR

Bojan Domić, s. r.

=====